



Broj predmeta: UP-I-KSI-09-05/22

Datum: 22.06.2022. godine

Na osnovu člana 25. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21) i člana 33. Poslovnika o radu Komisije za odlučivanje o sukobu interesa („Službeni glasnik Brčko distrikta Bosne i Hercegovine“, broj 19/21), Komisija za odlučivanje o sukobu interesa, postupajući po službenoj dužnosti u predmetu utvrđivanja povrede odredbi zakona od strane Š.S., na 25. sjednici održanoj 22.06.2022. godine donijela je sljedeće :

RJEŠENJE

1. Utvrđuje se da Š.S. nije u zakonom propisanom roku podnio izvještaj o imovinskom stanju nosioca javne funkcije Komisiji za odlučivanje o sukobu interesa, čime je postupio protivno odredbama iz člana 21. stav (2) i (3) Zakona o sprečavanju sukoba interesa u institucijama Brčko distrikta Bosne i Hercegovine.
2. **POZIVA SE** Š.S. da podnese izvještaj o imovinskom stanju nosioca javne funkcije Komisiji za odlučivanje o sukobu interesa, te na taj način otkloni razloge koji su doveli do kršenja odredaba Zakona o sprečavanju sukoba interesa u institucijama Brčko distrikta Bosne i Hercegovine u roku od 15 dana od dana prijema rješenja.
3. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine Š.S. se, saglasno odredbama člana 39. stav (1), tačka a), Zakona o sprečavanju sukoba interesa u institucijama Brčko distrikta Bosne i Hercegovine, izriče novčana sankcija u iznosu od 2.000,00 KM, koju je imenovani dužan uplatiti na račun i u korist budžeta Brčko distrikta Bosne i Hercegovine, račun primaoca 552-000-18267624-57, vrsta prihoda 723113-novčane kazne i troškovi postupka, budžetska organizacija 1604001, najkasnije u roku od 15 dana od dana dostave rješenja, pod prijetnjom prinudnog izvršenja, te da dostavi dokaz o uplati novčane kazne u prostorije Komisije za odlučivanje o sukobu interesa.

Obrazloženje

Dana 17.05.2022. godine, Komisija za odlučivanje o sukobu interesa je po službenoj dužnosti Zaključkom broj: UP-KSI-09-05/22 pokrenula postupak protiv Š.S. radi postojanja sumnje postupanja suprotno odredbama Zakona, te imenovanog pozvala na izjašnjenje o datim navodima.

Obzirom da imenovani nije u zakonom predviđenom roku dostavio pisano izjašnjenje na razloge o navodima iz zaključka, Komisija za odlučivanje o sukobu interesa nastavila je postupak shodno članu 32. stav (9) Zakona o sprečavanju sukoba interesa.

Dana 24.09.2021. godine, Skupština Brčko distrikta BiH dostavila je popunjen obrazac o javnoj funkciji i nosiocu javne funkcije (ANEKS I) za poslanika u Skupštini Brčko distrikta BiH Š.S., kao nosioca javne funkcije, a na osnovu Zahtjeva Komisije za odlučivanje o sukobu interesa, broj: KSI- 1-16/21 od 09.09.2021. godine.

Uvidom u dostavljenu dokumentaciju uz obrazac o javnoj funkciji i nosiocu javne funkcije (ANEKS I), Komisija za odlučivanje o sukobu interesa, utvrdila je sljedeće:

Uvjerenjem Centralne izborne komisije BiH, broj: 06-1-07-01-2103-2-3205/20 od 15.12.2020. godine, Š.S. izabran je za zastupnika u Skupštini Brčko distrikt BiH-Lokalni izbori 2020. godine.

Dana 17.11.2021. godine, Skupština Brčko distrikta BiH dostavila je Obavještenje broj: 01.1-05-4237/21-1 od 17.11.2021. godine, kojim obavještava Komisiju da je zastupnik u Skupštini Brčko distrikta BiH, Š.S., podnio ostavku Centralnoj izbornoj komisiji na mjesto zastupnika sa danom 01.10.2021. godine. Centralna izborna komisija Odlukom broj: 06-1-07-1-480/21 od 13.10.2021. godine, utvrdila je prestanak mandata zastupnika Š.S. te mandat dodijelila sljedećem kvalificiranom kandidatu s liste političkog subjekta, te je Š.S. prestao biti nosilac javne funkcije.

Dana 09.12. 2021. godine, Komisija za odlučivanje o sukobu interesa je Š.S. uputila Informaciju o pravima, obavezama i odgovornostima nosioca javne funkcije te Obavještenje broj: KSI-12-82/2021 od 09.12.2021. godine, kojim je skrenula pažnju na zakonsku obavezu dostavljanja izvještaja o imovinskom stanju nosioca javne funkcije (ANEKS II-Obrazac o imovinskom stanju nosioca javne funkcije, bračnog i vanbračnog druga, djece i drugih članova domaćinstva kao i lica prema kojima nosilac javne funkcije ima zakonsku obavezu izdržavanja), u roku od 30 dana od dana prestanka obavljanja javne funkcije te obavezu podnošenja izvještaja o imovinskom stanju nosioca javne funkcije dvije godine nakon prestanka obavljanja javne funkcije i to jednom godišnje, do 31. marta tekuće godine za prethodnu godinu shodno članu 21. stav (2) i (3) Zakona o sprječavanju sukoba interesa.

Imenovani do dana donošenja ovog rješenja nije dostavio izvještaj o imovinskom stanju nosioca javne funkcije kako po zahtjevu Komisije za odlučivanje o sukobu interesa broj: KSI-12-82/2021 od 09.12.2021. godine, tako ni shodno zakonom propisanom roku u skladu s članom 21. stav (2) i (3) Zakona o sprječavanju sukoba interesa u institucijama Brčko distrikta Bosne i Hercegovine, čime je počinio povredu odredaba iz člana 21. stav (2) i (3), Zakona o sprječavanju sukoba interesa u institucijama Brčko distrikta Bosne i Hercegovine.

Član 39. stav (1) Zakona o sprečavanju sukoba interesa u institucijama Brčko distrikta Bosne i Hercegovine propisuje novčane kazne nosiocu javne funkcije koji postupi suprotno odredbama člana 21. navedenog zakona.

Prilikom izricanja sankcije, Komisija za odlučivanje o sukobu interesa je vodila računa o težini povrede zakona, posljedicama povrede zakona, šteti koju je povreda nanijela integritetu javne funkcije koju je Š.S. obavljao, ličnosti imenovanog i odnosu imenovanog prema kršenju odredaba zakona te je Komisija za odlučivanje o sukobu interesa stava da izrečena sankcija odgovara težini kršenja zakona.

Imenovani se poziva da u roku od 15 dana od dana prijema ove odluke podnese Komisiji za odlučivanje o sukobu interesa izvještaj o imovinskom stanju nosioca javne funkcije i time otkloni povredu odredaba Zakona o sprječavanju sukoba interesa.

Komisija za odlučivanje o sukobu interesa je, cijeneći navedeno, shodno odredbama člana 25. i člana 21. zakona, donijela rješenje kao u dispozitivu.

Odluka komisije bit će objavljena na službenoj Internet stranici Komisije.

POUKA O PRAVNOM LIJEKU

U skladu s odredbama člana 37. stav (1) Zakona o sprečavanju sukoba interesa u institucijama Brčko distrikta Bosne i Hercegovine, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom u Brčko Distriktu BiH.

**Predsjednik
Komisije za odlučivanje o sukobu interesa**

Admira Mujić, dipl. pravnik

Dostaviti:

- Imenovanom
- Evidenciji i
- Arhivi